

9
DISSERTATIO
MEDICA
DE VITALI CORPORIS,
ET ANIMÆ FÆDERE.

Quam Deo duce, & auspice Dei-
parâ tueri conabitur in augustissi-
mo Apollinis Fano Monspeliensi
die mensis Decembris anni
1758. JOSEPHUS CARRERE
Perpinianensis apud Ruscinonen-
ses, Artium Magister, & Me-
dicinæ Alumnus.

P R O

Baccallaureatûs Gradu consequendo.

P E R P I N I A N I ,

Apud JOANNEM-BAPTISTAM REYNIER,
Regis, Illustrissimi D. D. Episcopi, ejusdem
Cleri, Urbisque Typographum.

ARGUMENTATURI

R. R. D. D. Professores Regii.

R. D. IOANNES FRANCISCUS CHICOYNEAU,
Cancellarius & Iudex.

R. D. ANTONIUS MAGNOL, *Decanus.*

R. D. HENRICUS HAGUENOT,
Pro-Decanus.

R. D. ANTONIUS FIZES.

R. D. FRANCISCUS DE SAUVAGES.

R. D. FRANCISCUS DE LAMURE.

R. D. FRANCISCUS IMBERT.





PRÆCELSO

AC PRÆPOTENTI VIRO

D. D.

JOSEPHO-AUGUSTINO
DE MAILLY,

Comiti de Mailly, Marchioni d'Hautcourt,
Baroni de Saint Amand, Castellano Dynastæ
de la Roche-de-Vaux, Douvres, La Faigne,
Pont-Vallain, Domino d'Assigny, de Saint
Leger, Tincour, Saint Marc, &c. Ecclesiæ
Cathedralis Elnensis primo Canonico hono-
rario, Abbavillæ Gubernatori, Equitum, &
Dimacharum Inspectori generali, Cataphrac-
torum Equitum, sub titulo Scotorum, præ-
fecto, totius Turmæ Galliarum Cataphractæ
Duci, Regionum exercituum, & Comitatum
Ruscinonis, Confluentis, & Ceritanæ Le-
gato, eorumdemque Comitatum à Rege
Præfecto.

COMES ILLUSTRISIME,

*Insitam generoso tuo pectori, propensam in om-
nes, inviam nulli, benignitatem tenues hæ tes-
tantur inclyto tuo insignite nomine, tuisque sub*

auspiciis prodeuntes studiorum meorum primitia,
 eam præ se ferendo, quâ Dadaleos vix subeunti
 alumno Artis pæonia flexus iter pandere non de-
 dignaris, ariadneum benigne concesso Patrocinio
 eidem porrigens filum, cujus patrem insignibus
 cumulasti beneficiis, quolibet grati animi sensu
 majoribus. Nec honorificum magis, & gloriosius
 occurrere mihi quidquam poterat, COMES
 ILLUSTRISIME, quàm præcelsum nactum esse
 mecenasem, charitum ac virtutum filo contextum,
 Martis & Apollinis decoratum Laureis, ornatum
 honoribus, Minervam pectore gerentem, moribus
 eruditum, quos sibi vindicant Saturni tempora;
 nobilissimâque editum stirpe, quæ ad Sæculum un-
 decimum, & altius, nec interrupto revolans as-
 censa, degeneri nunquam adulterata propagine;
 nec ingenti debilitata quantitate ramorum Regiis
 Angliæ, Galliæ, Castiliæ, Scotiæ, aliisque Su-
 premis, & principalibus stirpibus annexorum:
 nec eorum numero squallescens, qui tuendos
 inter, & amplificandos Regni fines Martis gla-
 dio excisi fuere: nec surculorum exhausta mul-
 titudine, quos tanquam Martis fulmina, Galli-
 cique firmamenta Imperii, totidemque Ecclesiæ
 miracula, & religionis propugnacula nobiscum
 mirabuntur posteri, fruticare non desiit, deflo-
 ruit nusquam, floruit semper, fructumque tan-
 dem peperit, quem exorata Ruscinonensibus in
 publicæ felicitatis pignus concessere numina.

Publicæ, privataque eorum felicitatis, cui
 anxissime studes, omnique, quâ vales, gratiâ

& autoritate inheres, obvia ubique adeo con-
 veniunt argumenta, ut quantamlibet pariant re-
 verentiam splendoris tui antiquitas quam ex-
 celsâ mente sustines, gloria celebritas quæ te
 non semel heroïum adjunxit globis, titulorum
 multitudo quibus non obruitur innata tibi ro-
 mana urbanitas, altior dignitatis tuæ gradus,
 sed animi præstantiâ inferior, eximieque dotes,
 tam Bellicæ, quam Civiles, & Politicæ, quæ
 felici connubio in te nuptæ cætera laudum orna-
 menta lucis suæ splendore complent; dubii ta-
 men tibi commissi semper hæreant Populi, an
 amore, an obsequio dignior fueris, quæ nun-
 quam dispari, sed equali semper incedere gressu
 sinent ubivis impressa beneficentiæ, ac benevo-
 lentia tuæ vestigia. Eâdem quippe te suspiciunt
 dextrâ Regni fines tuentem, Apollini templa vo-
 ventem, amicis & primoribus fidem & benevo-
 lentiam, Populoque patrociniû impendentem,
 ac publicis rebus paterne prospicientem, quâ ir-
 ruentes hostes tum consilio, tum prudentiâ, tum
 animi fortitudine reprimere, dejicere, proterere,
 laurosque metiri nosti. Nobilis incumbit erudienda
 juventus, Regiam imploras munificentiam, quâ
 multiplici disciplinarum genere mox instructum
 illi occurrit ephebeum. Tabæ, ac squallore ferme
 obsitæ languent Litteræ: Paterno mox tuo exci-
 piuntur sinu, sanguinem & spiritum in eo re-
 cuperaturæ. Errantes absque Patriâ, & hospi-
 tantes absque lare scientias audis: Patrios ner-
 vis omnibus conaris illis restituere penates. Am-

plissimos illic ordines multiplici contentionum turbine conquassatos tam firmo societatis, & concordia nodo ligas, ut arctius jam coalescentes, suisque contenti finibus unà consentiant, & ad se mutuò absque collisione jam accedant. Ad te, tanquam ad publicum Patronum & tutorem, confugiat quilibet, ejus exple vota, superas saepe, aliis semper, vix unquam tibi vivens, ullamque vix vitæ momentum officiis, & beneficiis vacuum abire patiens, quibus tibi devincti beneficium te sibi parentem vindicant Ruscinonenses, omne supergredientem amoris & obsequii testimonium.

An publicos, ILLUSTRIS SIME COMES, utriusque non præcurrere, propriosque non rependere motus deceret me, qui publicis non tantum ducendus exemplis, verum & propriis, vividisque studiis, ac inherens paternis visceribus amoris, reverentia, gratique animi sensus particeps, ad extremum usque vitæ spiritum tui gloriabor esse.

Addictissimus, devotissimus,
& observantissimus Servus,

JOSEPHUS CARRERE.

Dabam Monspelii
die mensis Decembris
anni 1758.



DISSERTATIO MEDICA

De vitali corporis, & animæ fœdere.

I.



ON prius hominis incipere vitam, quàm inito corporis & animæ, quibus ille constat, connubio; nec prius illam extinguere, quàm falcato mortis enle præscindatur utriusque nexus, nemo diffitetur edoctus fide. Non aliunde, quàm à solâ conditoris voluntate, repetenda duplicis illius substantiæ, spiritualis nimirum, & corporeæ unio, quæ, licet invicem unitæ, adeo inter se discrepant, ut nihil importet unius conceptus, quod alterius notio non excludat. Unionis illius leges frustra quis perscrutaretur; eas quippe unus ille novit, qui posuit solus. Earum ergo satis est per effectus inquirere cognitionem. Animæ essentiam perscrutantes Theologi D. Augustinum audiant,

cui anima audit, *Substantia creata, invisibilis, incorporea, immortalis Deo similis, imaginem nullam habens, nisi Creatoris sui* (a). *Phisicis animæ nomine post Aristotelem venit, Principium quo vivimus, sentimus, intelligimus, & loco movemur* [b].

II. A certis quibusdam corporis, non autem animæ, conditionibus pendere utriusque unionem, quæ vitæ constituit essentiam, quibus perdurantibus corpori inhabitat anima, deficientibus verò avolat, innuit effectus densioris ineluctabilium causarum nubis, quæ in substantiam spirituales nullatenus incurrentes, sed unam lædentes machinam corpoream, memoratam tollunt unionem, & mortem inferunt. Conditiones illas frustra quilibet alibi quæreret, quam in motu cordis, quod ideo vitæ oscillum non inepte vocabit. Quamvis enim is sit partium corporis humani consensus ad invicem, talisque actionum à se invicem dependentium, & in sese continuò recurrentium existat circulus, ut uni serviat altera, opemque mutuam desiderent variæ corporis partes & actiones, atque cæteris unius obstat læsio, æqualem tamen, & eandem non esse partium, & actionum singularum ad vitam sustinendam necessitudinem, eique perennandæ unius suffi-

(a) Aug. lib. defin.

(b) Arist. lib. 1. de animâ

tere cordis motionem innuunt vitæ primordia, sub quibus una deprehenditur cordis trepidatio feriantibus reliquis corporis embryonis organis, ejusdemque visceris motus à reliquo vitæ tractu individuus.

III. A cordis motu ordiri vitam innuit motus ille, vitæ prodromus, qui sub puncti salientis facie in embryonis cordulo sese prius prodit, quàm ulla in reliquis partibus conspiciatur motio, teste *Harvæo*, qui primum pulli gallinæci rudimentum in ovo incubato quatuor aut quinque diebus ab illius incubatione explorans, illud instar nubeculæ conspexit, in cujus medio punctum sanguineum palpitans conspiciebatur, vitæ principium agens (a); ita ut in foetu, vermiculi mollis exhibente figuram, solum deprehensum fuerit punctum sanguineum, sive vesicula pulsans (b); & confirmante *Ruischio*, cui sub puncti specie annexum carinæ trepidans cor solum apparuit (c).

IV. Vitali foedere nupta tandiu manebunt corpus & anima, quandiu cæteris licet languentibus, aut abolitis utriusque actionibus, qualiscumque perseverabit in corde motus, languidissimus etiam, & simul irregularis. Perennandæ vitæ ipse sufficit unus cordis

(a) Harv. de mot. cord. in Bib. an. t. I p. 842.

(b) Ibid. p. 863.

(c) Ruisch. Thes. 2 p. 54.

motus insensibilis; ut evincunt hysteriarum; syncopiarum, hominumque complurium aquis, aut nive submersorum exempla, in quibus ne minima quidem per horas, diesque complures lucebat vitæ scintillula, ullo tum sensûs, tum motûs, tum respirationis, tum sensibilis cordis motionis indicio se prodens, qui tamen vivebant, & vitam incolumem ad plures annos dein protraxere; sicut & exempla illorum, qui ob deficientia penitus omnigena sensûs, motûs, respirationis, & cordis actionis, saltem sensibilis, indicia, morti nomen adeo videbantur dedisse, ut cultro anatomico, vel sepulturæ damnati fuerint, & qui tamen prædæ suæ inhianti morti erepti diu vivere (a). Hanc non inepte cum *Hallero* dices vitam minimam, quam extinctis cæteris humani corporis actionibus una sustinet, languidissima, vel insensibilis cordis motio (b), cum præsto succedat mors, si de illâ tantillum dematur; nisi cum aliis illam appellare malueris mortem apparentem. Vitæ tandem sustinendæ sufficere, ipsiusque tutorem habendum esse cordis motum, probat non semel restituta tum frigidis, tum calidis animalibus, ipsique homini;

(a) Bruhier incert. des sign. de la mort. hall. Elem. phis. T. 2 p. 483.

(b) Hall. præl. §. 695. & 1078.

vita, cujus ne quidem ulla apparebant indicia, multiplici arte, quæ vel aëre per nares, aut os, tubulumvè tracheæ arteriæ immissum insufflato, respirationem extinctam exsuscitante, ac sic sanguinis à pulmone prius immobili ad cordis ventriculum sic restituyente, vel adacto per syphonem aëre in venam cavam, aut ductum thoracicum, cordis motum reintegravit. (a).

V. Eò tandem ipsò, nec prius disjunguntur corporis & animæ nexus, quò perit omnis in corde motus, quem in mortis procinctu ita procedere docent observata, ut extinctis jam reliquis totius corporis motibus crebriores, & debilissimæ, atque vermiculatæ evadant, moxque notabiliter intermittant cordis contractiones (b), ac dein moveri desinat sinister illius ventriculus, postea ejudem auricula sinistra, cesset mox ventriculi dextri motus, ultimòque pereat in auriculâ dextrâ, in quâ, quiescentibus auriculâ & ventriculo sinistris, tremula deprehenditur motitatio (c), diutiùs in eâdem, non secus ac in ventriculo congenere perdurans, majorique vi agens, quàm in sinis-

(a) Peyer, Wepf., Hook., aliiq. apud hall. præf. § 149. & 604.

(b) Hall. Elem. phis. T. 1 p. 413, & seq.

(c) Harv. de mot. cord. hall. exp. sur l'irrit. dans le Journ. de med, Octob. 1756. p. 246.

tris (a) ; post duas , tresvè auricularum pulsationes , quasi expergefactis cordis ventriculis , quandoque respondentibus , & unum pulsum lente ac ægre molientibus (b) , omnium demum ultimò pulsante trunco venæ cavæ (c) , cujus dilatationem , ac pulsationem , nullatenus vitalem , excitat superstes motus in appellente sanguine , qui in collapsam auriculam dextram evomi nequit , & quamdam exerente pressionem lateralem in illius trunci parietes.

VI. Num ergo jure mors appellatur cordis quies (d) ? Num igitur *Cordis actione cessante mors est* , eâ vigente vita , ut statuit Boëraavius (e) , & Galeno jam placuerat , quo teste , *Si cor respiratione* , id est motu , privetur , *hominem illico perire necesse est* (f) , *nullumque interire potest animal* , quin cor ab agendi munere cesseret (g).

VII. Assensum unus ille renuere valeret , cui notum foret aliquod exemplum tum hominis viventis , in quo omnimoda perierit cordis motio , tum mortui in quo perduraverit. An prioris speciei exempla reperiisse

(a) Drelincurr. canic. §.

(b) Harv. de mot. cord.

(c) Apud hall. phil. T. 1 p. 470 , & præl. § 159 litt. t.

(d) Hall. præl. § 919.

(e) Boer. orat. de hon. & serv. med.

(f) Gal. de Loc. aff. lib. 5 cap. X.

(g) Gal. de simpl. med. fac. lib. 3 cap. 18.

crederet apud militem hispanum, aliumque, qui evulso corde voces aliquas protulere (a), aut apud facinorosum hominem, cor è proprio pectore avulsum in manu carnificis adversis oculis contemplantem (b)? *Gerardum Van Swieten*, & *Hallerum* audiat, è quibus memorati phænomeni enodationem eruet, cordis motûs necessitudinem ad vitam sustinendam nullatenus convellentem (c). An exempla posterioris speciei putaret offerre cordis ex homine eviscerato educti, ac in ignem projecti saltus, primò ad sesquipedalem, dein ad minorem, & minorem gradatim altitudinem per octo prima horæ minuta repetitos (d), atque observatam post mortem pullationem in corde Latronis audacissimi, in quatuor licèt partes secto (e)? Verùm superstites illi á morte cordis humani motus non vitales, sed irritabilitatis effectus erant [X].

VIII. Spe caderet, qui sustinendæ vitæ necessarium non esse cordis motum colligeret ex vigentibus tum motu voluntario, tum sensu, vitæque perdurante in testudine, ranâ, viperâ, salamandrâ, evulso licèt corde. Diversa namque videtur in frigidorum ani-

(a) J. A. Costa, & Bacon. apud hall. phis. T. 1. p. 483.

(b) Barthol. apud hall. ibid.

(c) Van Swiet. comm. in Boër. aph 170 hall. præl. § 695.

(d) Bacon. hist. vit. & mort. p. 390.

(e) Zac. lusit. obs. 141 lib. 1.

malium corporibus fabrica , ac in humano corpore , diversisque proinde illa reguntur legibus , & ex phaenomenis in illorum corporibus observatis concludi non potest ad corporis humani systema , ut advertit *Hallerus* (*a*).

IX. Nec feliciori spe lactaretur , qui illud idem comprobare satageret , non tantum ex perdurante post mortem motu in corde , etiam exciso , ranarum , anguillarum , serpentum , aliorumque animalium frigidorum , imo & complurium animalium calidorum , ut canis , felis , corvi , pulli gallinacei (*b*) ; verum & ex observato interdum superstite post mortem motu in humano corde [VII].

X. Hos quippe vitales quivis perperam censeret cordis motus in animalibus , tum frigidis , tum calidis , ipsoque homine post mortem interdum superstites. Numne potiori jure ab irritabilitate , cordis fibris , non secus ac reliquis totius corporis fibris carneis insita , in illis extincto animali perdurante , & ab externa quâdam causâ facile concitanda , illi deducendi ? Nec diffitebuntur , qui omnibus & singulis fibris muscularibus duplicem norunt inesse vis contractilis speciem , præter aliam , carneis , atque reliquis quibuslibet fibris mollibus commu-

(*a*) Hall. præl. § 285.

(*b*) Apud hall. phis. T. I p. 472.

nem , omnium debiliorem , quæ neque ab earum sensibilitate , neque ab animæ voluntate dependet , cum in emortuo etiam animali perseveret , donec corruptæ fuerint , aut sicciores evaserint , aliove quolibet notabili modo alterata fuerit earum structura ; ut probant mutua retractio extremorum musculi secti , aliarumque partium mollium sectarum in extincto animali ; sicut & post mortem adeo imminuta moles arteriarum , earumque maxima retractio non paucis comprobata experimentis (*a*) , quamvis tamen sanguine penitus vacuas eas non esse innumera probent observata (*b*) ; & quæ vix ab elatere distinguitur , ideoque contractio elastica vocata fuit à nonnullis (*c*) ; ubivis in corpore sese prodens , & innumeris obnoxia remissionis , ac intensiōis gradibus , pro diversâ fibrarum rigiditate , vel mollitie ; unde remissior in pueris & fæminis , vividior in adolescentibus , juvenibus , & viris , languidaque in senibus adest elastica fibrarum vis. Muscularibus quippe fibris inest vis contractilis , nifus nempe ad decurtationem , vel ad retractionem , cujus duplex distinguenda species. 1^o Nimirum una , sequenti validior , à vi per nervos appellente procedens , &

(*a*) Hall. phis. T. 1 p. 70.

(*b*) Hall. ibid p. 197.

[*c*] Sauvag. phis. p. 119.

ab ea ita dependens , ut absque eâ vigere nequeat , testante repetitâ nervorum sectione , vel ligaturâ , quam protinus secuta fuit perdita musculorum contractio , quibus illi prospiciebant (*a*) ; & ut inducta nervis irritatio ad fibras musculares transmittatur , variosque in illis producat motus , multiplici comprobante experimento (*b*) , alternantem in fibris carneis inducens motum , quo ad mediam musculi partem illæ adducuntur , pristinam suam sedem mox recuperaturæ (*c*) , sicut & rugas , & transversas undas (*d*) ; & quæ vera est contractio muscularis , toto vitæ decursu perdurans , & cum vitâ extinguenda. Cordi , non minus quam reliquis musculis , hæc inest contractilitatis species , verè vitalis dicenda , ut pote ultimo vitæ spiritu sufflaminanda , & quæ à nervorum commercio ita dependet , ut utroque pari vago in cervice arctè ligato , vel præcincto tremulus , & irregularis evadat cordis motus , quem aliquandiu sustinent illibatæ cardiacæ propagines intercostalis nervi , & ad aliquot dumtaxat dies languidam vitam protrahant

[*a*] Apud hall. præl. § 401 litt. S. & exp. sur l'irrit. Journ. de med. Juillet 1756 p. 18.

[*b*] Hall. præl. § 401 litt. S. & exp. sur l'irrit. ibid. p. 12.

[*c*] Hall. exp. sur l'irrit. ibid. p. 17 & 10.

[*d*] Hall. ibid. p. 17.

animalia (a), quin tamen ob hanc ultimam rationem subito pereant, nisi quodam infelici casu id contigerit, ut in Bhonii, Bergeri, & Varignonii experimentis, observante Hallero (b); & ut sectis utriusque lateris octavo pari, & sympathetico magno non subito quidem extincta fuerint animalia, sed ad septimam horam in petiti experimento (c), imo & ad dies integros in experimento Vieussenii vitam protraxerint (d), vitalem adhuc cordis motum per memoratum tempus sustinentibus fibris nerveis ad cor mittendis à ganglio cervicali infimo, cujus potiore partem efficiunt nervi cervicales & dorsales, arte nullâ secandi absque arteriæ cujusdam notabilis lethali vulnere (e). Altiùs tandem in collo secetur, aut violetur medulla spinalis, quæ præcipua nervorum cordis scaturigo est, subito extinguuntur animalia, ut repetitis compertum fuit observatis & experimentis (f). Si quandoque conti-

(a) Lower tract. de cord. in Bib. an. T. 1 p. 396. willis nerv. descript. ibid. Tom. 1. pag. 597. aliisque apud Hall. phis. Tom. 1. pag. 461.

(b) Hall. Phis. Tom. 1. pag. 463.

(c) Mem. de l'Acad. des Sciences, année 1717.

(d) Vieuss. de cerebr. in Bib. an. Tom. 1. p. 128.

(e) Hall. Phis. T. 1. pag. 463. 464. & 357. vide etiam Van Swiet. comm. in Boer. aph. 170.

(f) Collectis ab Hall. præl. § 401. litt. u § 600. Litt. a phis. Tom. 1 pag. 464. & exp. sur l'irrit. Journ. de Juin 1756. pag. 448.

gerit ea non subito, sed brevi temporis intervallo periisse, ut variæ probant observationes (a), ideo procul dubio quia vitales cordis contractiones musculares per breve temporis intervallum sustinere fibræ quædam nerveæ à nervis dorsalibus oriundæ, & mediante memorato Ganglio ad cor propagandæ. 2° Quæ fibris carneis inhæret, altera contractilitatis species, irritabilitatis nomine donata, sat improprie tamen, cum hujus illa sit effectus, eundem, ac jam memoratum, in illis effectum inducit (b), toto non solum vitæ curriculo perdurat, verum eâ extinctâ perseverat (c), inducto stimulo exsuscitatur, si evanuerit (d), absque nervorum ope subsistit (e), & ab eorum actione vel commercio ita parum dependet, ut illatâ irritatione suos exerat effectus, motuque quodam contractili moveantur musculi, sectis licet partium nervis, imo & capite truncato, dissectâque spinali medullâ (f), stimulo non tantum fibris carneis inducto, verum etiam nervis admoto,

[a] Collectæ ab Hall. phis. T. 1. pag. 464, & Van Swier. comm. in Boer. aph. 170.

[b] Hall. expl. sur l'irrit. Journ. de Med. Juillet 1756. pag. 17. & 10.

[c] Ibid. pag. 18.

[d] Ibid. pag. 16.

[e] Ibid.

[f] Jausserand. exp. de sensib. p. 13. Hall. ibid. Journ. de Juillet 1756, p. 16. Octobre p. 250.

& ad illos propagatâ eorum irritatione; ita post mortem exfufcitanda, ut irritatis nervis ad feptem tranfverfum, aliosque mufculos per-tingentibus exurgant diaphragmatis, & aliorum mufculorum motus (*a*); imo & non minùs convellantur mufculi, irritatis eorum nervis, licèt fublata fuerit eorum continuitas cum medullâ oblongatâ & fpinali, ac fi remanferit illibata (*b*). An tamen quia in fibris carneis eminet irritabilitas, cæteras quafibet fibras, non carneas, minime crederes irritabiles cum *Hallero* (*c*)? Ei non adftipulabitur, qui cutem, externam inteftinorum membranam, mefenterium, aliasque nonnullas corporis animalis partes, quæ fibris mufcularibus orbantur, admotis acribus irritabilitatis haud dubia præbuiſſe indicia noverit (*d*). Cum ipſo forſan regeres *Hallero* fibras animales omnes, etiam dudum exanimas, utique criſpare & contrahere immanem aquarum ſtygiarum, & ignis violentiam; proindeque contractilitatem ortam in fibris non carneis ab illorum admotione non ſufficere ad concludendum eis innatam

[*a*] Hall. *ibid.* Journal de Juillet p. 15. 16. Girard de Vill. *Quæſt. Med. Paris.* diſcut. ann. 1757 an ut ſenſib. ſic irritab. à nervis.

[*b*] Hall. *ibid.* p. 14.

[*c*] Hall. *phif.* T. 1. pag. 8.

[*d*] Lorry exp. ſur l'irrit. Journal de Med. Decembre 1756. p. 415. 416. 417.

esse irritabilitatem (a). Verum quid diceret *Hallerus*, si independenter ab ullâ corporum hujuscemodi applicatione vis appareret contractilis in partibus omni fibrarum carnearum apparatu destitutis, ut ex ipso patet; cum eodem fatente innata vasis lacteis & lymphaticis, nullatenus musculosis, insit vis contractilis (b); solâque lucis actione vividâ contrahatur iridis annulus, quem nullatenus musculosum, sed plane membranaceum, ille idem statuit (c). Omnibus tamen, & quibuscumque corporis humani fibris irritabilem inesse vim perperam concluderetur, cum admotis licet irritantibus chemicis nulla sui det indicia in peritonæo, in textu cellulari, in tendinibus (d), in cerebro, cerebello, medullâ spinali, & oblongatâ, variisque aliis corporis partibus (e). Ulteriora ergo desiderantur argumenta, quæ nodum solvant. Ea autem vis contractilis fibris innata, & a nervis prorsus independens, quæ admoto stimulo exsuscitatur, neque cum elasticâ vi confundenda, abique previâ enim distensione sui dat indicia, neque cum priori contractilitatis specie à nervis procedente, quippe

[a] Hall. *Phil. T.* I. pag. 8.

[b] Hall. exp. sur l'irrit. *Journ. de Med.* Août 1756. p. 36. & *Phil. T.* I. p. 166.

[c] Hall. *ibid.* Juillet p. 21.

[d] Lorry *ibid.* Decembre 1756. p. 416. 419.

[e] Girard de Vill. *quæst.* cit. §. 4.

quòd non solum absque nervorum ope illa
viger, ac post mortem etiam perdurat; dum
è contra à nervis hæc procedit, & cum vitâ
extinguitur; verum etiam ita debiles sunt par-
tium carnearum motus à morte superstites,
& ab irritabilitate pendentes, ut paucissima-
rum unciarum pondere coërceri possint, nec
ponderibus elevandis, nec diffringendis cor-
poribus durioribus pares sint, vires verò
musculorum à nervis procedentes, & in vi-
venti animali vigentes maximæ sint. Quam-
vis tamen à vi nerveâ nullatenus pendeat
illa vis contractilis, quæ irritabilitatis ef-
fectus est, ab eâ tamen novum acquirit vi-
gorem, intensiorique gradu viger, dum in
viventi animali eodem tempore operatur con-
juncta cum vi contractili à nervis oriundâ,
quæ aliam adeo adjuvat & adauget, ut de-
ficiënte, vel inertis partis nervo modice con-
trahantur partis illius fibræ, vehementiùs
verò eæ convellantur, si vis nervea irritato
illius nervo accesserit. An tandem irritabi-
litem tanquam sensibilitatis effectum haberes
cum *D. Lorry* [a], qui secum certare vi-
detur, mesenterio sensibilitatem denegans [b],
& insignem vim contractilem concedens [c].

[a] Lorry exp. sur Pirrit. Journ. de Novemb. 1756,
p. 324.

[b] Ibid. pag. 331.

[c] Ibid. Decemb. p. 416.

Ed potiori jure negat *Hallerus*, quòd non tantùm multiplici comprobaverit experimento sufflaminatâ licèt per nervorum ligaturam partium sensibilitate (a), imo & post mortem [b], atque in intestinis è corpore excernis [c] superesse vim contractilem, seu irritabilem; verùm etiam quòd partium motus excitatæ sensationi semper non respondeat, innuente vividiori sensatione ab irritatione tendinibus, & nervis illatâ [XIV] absque motu eorum evidenti [d]. Nec minùs cordi, quàm reliquis musculis insita est vis contractilis ab irritabilitate, imo & potentiùs, ac diutiùs in corde viger [e]; eaque à nervis adeo parum procedit, & à vitâ tam parum individua est, ut nervis cordis destructis, truncatoque capite, ac extincto etiam animali perduret [f], ab admotis irritantibus, à frigidi aëris tactu, aspersâ aquâ calidâ, similibusque causis exsuscitanda, postquam semel quievit, ut bene multorum, nuperaque comprobant *Halleri* experimenta [g].

XI. Supersit ergo post mortem in ani-

[a] Hall. exp. sur Pirrit. Juillet p. 18. 19.

[b] Ibid.

[c] Ibid. Oâob. p. 245.

[d] Hall. exp. sur Pirrit. Juillet 1756. p. 13. Lorry exp. sur Pirrit. Decembre 1756. p. 409, & 419.

(e) Hall. ibid. Oâobre 1756. p. 246.


(f) Hall. phil. T. 1. p. 486. 487.

(g) Ibid. p. 465. 470, & seq.

malium, tum frigidorum, tum calidorum; ipsiusque hominis corde motus quidam, motus cordis necessitatem ad vitam sustinendam nullatenus ille convellit, ut pote minime vitalis, & à nervis non procedens, sed ab irritabilitate; nec ullatenus constans, aut durabilis, & motui in viventis animalis corde conspicuo similis, brevissimo è contra tempore sufflammandus, atque velut intestinalis, & undosus, ut instituta probant experimenta [41].

XII. Foederatas inter illas substantias mutuuum adest, ac tale commercium, ut à variis corporis motionibus diversimode modificetur anima, nec ulla possit in eâ elici operatio, nisi quodam præeunte motu corporeo; & ut ab animâ procedat motio quælibet activa in corpore edenda. Hunc animæ consensum cum corpore, memorarumque illius imperium in corpus duplici capite indagaturi sumus, reciprocam inter duplicem illam substantiam malorum communionem, idem comprobantem commercium, pathologis explanandam relinquentes, ut pote physiologice illud contemplaturi.

(41) Girard de Vill. [quæst. Med. cit. 36-40]



C A P U T P R I M U M.

De consensu animæ cum corpore.

XIII. **D**Iversis organorum corporeorum motionibus animam flexi non diffitebitur, qui ad varias^A operationes attendens, prævias perscrutabitur mutationes, quæ in corpore sunt, & quibus objecta præsentia illa percipit, seu sentit; absentia, tanquam presentia, ei offeruntur, seu imaginatur; binas invicem comparat ideas, quin eas cum unâ tertiâ conjungat, seu ratiocinatur; respectum cognoscit inter duas ideas, mediante tertiâ, quâcum conjunguntur, vel quas disjungit, seu judicat; eorum reminiscitur, quæ sensationum & idearum prius oblatarum ope percepta olim fuere, cum adjunctâ loci, temporis, aliarumque circumstantiarum, quibus illa percepta fuerant, relatione, seu recordatur; atque dum ad aliquod objectum illa inclinatur pro ratione boni in eo distincte percepti, seu vult. Ex illis quippe variis animæ operationibus nullam, nisi consequenter ad prævium quemdam organorum corporeorum motum, in illâ elici patebit mox delineandis eorum motionibus, à quibus illæ omnes dependent animæ operationes.

XIV. Corporis tutelæ, cui præest, nequit anima invigilare, nisi motus edendo convenientes, quibus ab externarum injuriarum hominem undequaque circumdantium, & ab hostilium turbarum internarum insultu corpus tueatur, eaque retineat, aut prosequatur, quæ nativum alere queunt animalis æconomix concentum. Ad illos edendos motus nequit anima determinari, nisi excitatis ideis, quæ ipsi representent indolem, & proprietates eorum, quæ corpori exterius admoventur, aut ipsum contingunt interius, ut sic ea cognoscat, quæ vel fugienda, vel prosequenda sunt. Illæ autem idæ prævias supponunt impressiones organis corporeis inditas, & ad animæ solum propagandas. Hunc in finem certâ quâdam dispositione memoratis impressionibus excipiendis, & ad animam transmittendis aptâ, seu sensibilitate majori, vel minori illa dotantur, a fibris nerveis per illa dispersis adeo procedente, ut ligato vel secto partis nervo, in eâ pereat sensus [*]; quæ, multiplici comprobante experimento, non paucis denegata fuit partibus, ut epidermidi, ossibus, cerebri

[*] Hall. exp. sur l'irrité, Journ. de med. Juillet 1756
& præf. § 285,

cortici [a], membranis cellulosis [b], peritonæo, omento, mesenterio [c], mediastino [d], externæ superficiei ventriculi, renum, intestinorum, splenis, ureterum, vesicæ felleæ, hepatis, glandularum in abdomine contentarum [e], sicut & pulmonum ac pericardii [f], non minùs quàm piæ meningi [g], arteriis ac venis orbatis fibrarum nervearum propaginibus per earum superficiem disseminatis [h], prostratis [i], aliisque nonnullis corporis partibus; quæ in renum, hepatis, ac splenis substantiâ obrusa est [k], in glandularum parotidum & maxillarium intimo textu viget [l]; quam carnes musculorum parti concessam offerunt ex-

[a] Hall. exp. sur Pirrit. Journ. de Juin 1756 p. 444. Bianchi au Journ. de Janvier 1756 p. 55. Girard de Villats quæst. med. citat.

[b] Lorry exp. sur Pirrit. Journal de Decembre 1756. p. 406.

[c] Lorry ibid. Novembre 1756.

[d] Lorry ibid. Decemb. 1756. Jausserand de Sensib. exp. 19.

[e] Lorry ibid. Journ. de Novembre 1756.

[f] Lorry ibid. Decembre 1756. Girard de Vill. quæst. cit. Hall. phis. T. 1 p. 280. Jausserand exp. 19.

[g] Hall. exp. sur Pirrit. Journal de Juin 1756. p. 441.

[h] Lorry Ibid. Decembre pag. 406. Hall phis. T. 1 p. 70. Arteriis tamen sensibilitatem inesse, imo & venis, licet minorem, putant alii (Girard de Vill. quæst. Med. cit., & Jausserand exp. 14.)

[i] Girard de Vill. quæst. Med. cit.

[k] Hall. ibid. Juin 1756. Lorry ibid. Decemb. 1756.

[l] Girard de Vill. quæst. cit. Jausserand exp. 15.

perimenta quædam [a], non satis tamen certa juxta nonnullos [b]; quæ in diaphragmate (c), in testibus (d), in ligamentis [e], in mucilaginosi haversii glandulis [f], & in pericranio [g] manifesta est, sicut & in tendinibus, & partibus aponevroticis, quibus haud dubiam inesse sensibilitatem varia comprobant experimenta [h], contra *Hallerum* [i]; quæ in nervis [k], in cute, in linguâ [l], in periostæo (m), in urethræ membranâ [n], in uteri (o), trachææ arteriæ, bronchiorum, ventriculi, intestinorum, ureterum, vesicæ urinariæ, ductuum biliarium, aliorumque viscerum membraneorum internâ superficie (p), ac præsertim in ossium medullâ, ejusvè textu

(a) Gir. de Vill. ibid. § 2.

[b] Lorry ibid. Decembre 1756.

[c] Gir. de Vill. Ibid.

[d] Ibid.

[e] Ibid. & Jausserand. exp. 132.

(f) Gir. de Vill. ibid.

[g] Ibid. & Jausserand exp. 52.

(h) Lorry, Bianchi ubi supra. Girard de Vill. quæst. Med. citat. Jausserand de Sensib. exp. 1. 2.

(i) Hall. exp. sur la sensib. journ. de Med. Juin 1756.

(k) Lorry, & Gir. de Vill. quæst. cit.

(l) Lorry ibid.

(m) Gir. de Vill. ibid. Jausser. exp. 4.

(n) Gir. de Vill. ibid.

(o) ibid.

(p) Lorry ibid. Journ. de Novembre 1756. Jausserand exp. XX.

membranoso (a), spinali medullâ (b), & oblongatâ (c); sicut & in medullari cerebri substantiâ juxta nonnullos (d), dissentientibus aliis, quibus insensibilem medullarem cerebri contextum obtulere instituta experimenta (e).

XV. Quamvis autem à nervis procedat partium sensibilitas, perperam tamen concluderetur eam nervorum per illas dispersorum copiae proportionalem esse. Contrarium quippe innuunt, tum exemplum mesenterii copiosissimis nervis gaudentis, sensu tamen orbati (f); tum duræ meningis, etsi paucissimis dotatae nervis (g), acutior sensus, multiplici comprobatus experimento (h) contra *Hallerum*, (i); quibus addi posset exemplum cordis, cui magni prospiciunt & numerosissimi nervi, si verum sit ei nullum, aut obtusiores inesse sensum (k) ut innuere videntur observatio juvenis illius, qui *Harvai*,

(a) Lorry Gir. de Vill. ibid. Jausf. exp. 3.

[b] Hall, Lorry, Gir. de Vill. ibid. Jausf. exp. 12.

[c] Hall, Lorry, Gir. de Vill. ibid. Jausf. exp. 6.

[d] Hall, Lorry ibid.

[e] Jausserand exp. 6, 7, 8, 9 Gir. de Vill. quest, cit. § 1.

[f] Hall. præl. § 120.

(g) Ibid. § 301. litt. a.

(h) Lorry, & Gir. de Vill. ubi supra Jausserand exp. 6. 9.

(i) Hall. exp. sur l'irrit. Journ. de Juin 1756.

(k) Hall. præl. § 300. & phil. T. I. p. 489.

& Regis Angliæ manum cor tangentem nullatenus sentiebat (*a*) ; iterataque experimenta , quibus pateruit non sensisse canem , cujus irritatum fuerat cor (*b*) , eoque cum spiritu nitri , & sublimato corrosivo irritato nullum canes præbuisse sensibilitatis indicium (*c*) ; quod tamen non tanquam omnino certum habere sinunt. 1° Summa , quæ medias inter agitationes & mortis periculum intercedit , difficultas in definiendâ cordis sensibilitate (*d*). 2° Sectiones Cadaverum , quibus vermiculi reperti fuere in cordibus nonnullorum , qui de cordis dolore ac tremore multum , ac diu conquesti fuerant (*e*). 3° Cordis dolores , & puncturæ , quæ inter signa vermium in pericardio existentium a practicis recensentur (*f*). 4° Cordis dolor , quo vexabatur mulier , in cujus sinistro cordis ventriculo repertum fuit carnis nigrioris frustulum (*g*). 5° Syncope , quâ corripiebatur quidam , dum digito per ulceris aperturam immisso cor tangebatur Chirurgus (*h*).

(*a*) Harv. de gen. anim. exerc. 53.

(*b*) Jausf. exp. 19.

[*c*] Lorry exp. sur l'irrit. Journ. de Dec. 1756. p. 405.

[*d*] Gir. de Vill. quæst. cit. § 2. Jausf. de sensib. pag. 13.

(*e*) Bonet sep. an. T. 1. p. 833.

[*f*] Hartman. prax. chim. cap. 3. Etmull. T. 2. pag. 380.

[*g*] Bonet ibid. p. 838.

[*h*] Senac. mal. du cœur T. 2. lib. 4. chap. V.

XVI. Sensibilitatis gradum diversum, quo variæ potiuntur corporis partes, potiori jure repertes à diversâ dispositione, variâque tensione fibrarum nervearum illis prospicientium, ut evincunt. 1^o Exquisitior plevræ sensus iteratis experimentis comprobatus (a) contra *Hallerum* (b), minùsque à copiosis fibris nerveis per illius contextum disseminatis, quàm ab aponevroticâ & tendineâ illius compage procedens [c]. 2^o Acutior partium sensus, in quarum contextu ultimæ terminantur fibræ medullares sub formâ villosâ, suisque destitutæ vaginulis, ut membranæ pituitariæ; sicut & membranarum villosarum internam obvestientium superficiem viscerum membraneorum; quæ mucco quodam ideo inungitur, ut retundatur irritantium acies ac energia, & à corporum acrium ac stimulantium actione illa vindicetur; atque partium, in quibus medullares, nullâque obvestitæ vaginâ deprehenduntur fibræ nerveæ, quales sunt medulla spinalis, ac oblongata. An autem non in nervorum involucris, sed in medullosis eorum fibris residere sensibilitatem innuere videtur eximia illa sensibilitas, quâ donantur partes, quarum compagem subeunt fibræ ner-

(a) Lorry exp. sur l'irrit. Journ. de Decembre 1756
Jaus. exp. 18.

[b] Hall. exp. sur l'irrit.

[c] Lorry ibid.

veæ medullofæ , fuis deftitutæ vaginulis ? Ita certe ; nifi facilè non folvendum emergeret dubium ex plevræ , duræ meningis , pericranii , aliarumque partium aponevroticarum exquisitâ fenfibilitate , quarum contextum non molles ac medullofæ fubeunt fibræ nerveæ , fed tenfæ , fuisque veftitæ membranis. 3° Exquifita fenfibilitas in partibus tendineis , ac aponevroticis confpicua , quæ fumme tenfis dotantur fibris nerveis. 4° Senfibilitas major , quâ , præ virilibus , potiuntur corpora fœminea , ob teneriores , & quafi nudas ob involucris tenuitatem fibras nerveas , ftimulis proinde magis patentes in sexu fœmineo , quàm in virili , in quo denfiori vaginâ illæ inveftiuntur. 5° Tandem intenfor illa fenfibilitas , quâ præ adultis pollent pueri , & ob quam levi etiam de caufâ in morbis tam proni illi funt ad convulfiones , & motus convulfivos (4) , ac ex eo potiffimum procedens , quod teneriores funt eorum nervi , atque tenuioribus , & minùs denfis obveftiti vaginis.

XVII. In quinque fenfuum externorum organis eminet adumbrata fenfibilitas , ut animæ femel oblatâ impreffione nerveis illorum fibris tum immediatè inductâ à corporibus tactilibus , & fapidis , mole , figurâ ,

[4] Van Swiet. comm. in Boer. aph. 1074 1703.

motu , calore , vel frigiditate , gustûs & tactûs organorum fibras nerveas afficientibus ; tum illis mediâtè impressâ ope tenuissimorum effluviâ à corporibus odoriferis emissorum , & in olfactûs organum irruentium , vel aëris à corpore sonoro vibrati , & susceptam vibrationem ad auditûs organum deferentis , aut radiorum lucis ab objectis coloratis impulsorum , vel reflexorum ad organum visûs , distinctæ in animâ oriantur sensationes & ideæ , quibus determinetur ad motus edendos corporeos , avertendis malis ruinam intentantibus , eisq; capessendis bonis , quæ animali œconomix grata sunt aut proficua , idoneos.

XVIII. Nec minùs necessariæ sunt in partibus internis motiones , quibus ea retineantur , quæ animali œconomix utilia sunt , aut expellantur quæ tum propriâ indole , tum mole , tum quantitate illi noxia sunt , ejusdemque nativus alatur concentus. Hos in fines verè musculari apparatu viscera nonnulla , uti cor , & involucro musculofo alia donantur viscera , ut œsophagus , ventriculus , intestina , vesica urinaria &c. Nec possunt partium illarum motiones excitari absque stimulo quodam intûs latente , & ad motus illos edendos potentiam determinante motricem , quæ animæ inhæret (XXV. XXIX). Obtusior autem est textûs muscularis sensibilitas ;
imò &

imò & in propatulo non adhuc posita [XII] ; nec certis adhuc constat experimentis cordi concessa sensibilitas, quæ si ei insit, nonnisi obtusa esse potest [XV]. Obtusa proinde in musculosis viscerum involucriis adest sensibilitas. Allata siquidem experimenta [XIV], quæ probant exquisitiori sensibilitate præditam esse ventriculi, intestinorum, vesicæ urinariæ &c. superficiem, acutam dumtaxat arguunt villosæ eorum tunicæ sensibilitatem, sed pari gradu eam in illarum tunicâ carneâ residere non comprobant. An ideo sensu obtuso imbuuntur partes internæ, quæ perenni motu agitandæ sunt, ne à jugi attritu, qui continui earum motûs esset individuus, dolerent jugiter, ut facile contingeret, si exquisitiori sensu pollerent? *Halleri* sententia est (a), cui enodandum superest, cur sensibilitate destituantur hepar & splen, in quibus nulla deprehenditur motio. Obscuriori sensu præditis memoratis partibus internis musculari contextu donatis nonnisi leves indere possunt impressiones corpora in earum fibras impingentia. Ad animæ solum transmissæ segnes illæ impressiones confusas dumtaxat & obscuras, non verò claras & distinctas, in illâ excitabunt ideas, quibus animæ inhærens potentia motrix, naturæ nomine donanda [XXXIX] jam adumbratas

(a) Hall. præf. §. 308

partium internarum motiones ad edendas determinatur.

XIX. Nonnisi partium corporis humani motu objecta sensibilia posse animam percipere probant jam delineandæ mutationes organis corporeis inducendæ, ut sensatio in illâ excitetur. Idque non tantum verum est de objectorum presentium perceptione, quæ directa, seu externa sensatio vocatur; sed etiam de objectorum absentium, ac proinde nullum è sensibus externis afficientium, prius tamen cognitorum, perceptione, renovandâ a renovato motu fibrarum emporii, ad quas transmissa fuerat impressio ab objectis prius edita, dum presentia erant, & æquipollente motioni, quam in illis fibris excitarent eadem objecta, si presentia forent: eaque reflexa nuncupatur, vel interna sensatio, ab imaginatione vix, aut nullatenus discrepans.

XX. Quæ in sensuum extetnorum organis, omnium prima ab objectis sensibilibus inducitur, mutatio, in fibrarum nervearum per illa dispersarum motu, modò evidenti, modò per effectus duntaxat cognito, consistit; nulla quippe sine motu concipi potest mutatio corporea. Nec excitandæ sensationi sufficit impressus organis illis motus. Ad emporium transmittendum illum esse probant, tum sensuum extetnorum, sicut & sensus interni abolitio in apoplexiâ, vel imminutio

notabilis in aliis morbis contingens affecto-
emporio, cujus ablata labe restituuntur; tum
sensuum externorum eclipsis, quæ protinus
sequitur sublatam organorum illorum com-
municationem cum emporio per nervorum il-
lis prospicientium sectionem.

XXI. Eidem tandem inducendæ sensationi
alia requiritur conditio, ut scilicet ad emp-
orium transmissio memorato motu, medullares
vibrentur illius fibræ, tremulâque suâ succu-
tione animam ita afficiant inductam ab ob-
jecto externo sensibus externis impressionem
ei exhibendo, ut præsens objectum percipiat,
moneaturque præsentis periculi fugiendi, aut
boni, vel grati prosequendi, sicque corporis
conservationi consulere queat. An tamen
cum lancisio in corpore calloso, an cum
Vieussenio in corporibus striatis, cum *Carte-*
sio in glandulâ pineali, cum *Santorini* in me-
dullâ spinali, cum *Nuckio* in centro ovali,
cum nonnullis in septo lucido, aliâve quâ-
libet cerebri parte reponendum animæ so-
lium? omnipresens illa est. Id ergo dum-
taxat ex dictis colligendum animæ modifica-
tiones & operationes alligasse supremum con-
ditorem fibrarum sensorii communis, vel em-
porii motionibus, cujus nomine venit locus
ille, ad quem feruntur impressiones sensibus
externis inductæ, ille nimirum, in quo à
cinereâ cerebri, cerebelli, & medullæ spi-

nalis substantiâ oriuntur fibræ nerveæ ; & cujus proinde non unica , sed multiplex est sedes , cum non ab eâdem ac minimâ tum cerebri , tum cerebelli , tum medullæ spinalis particulâ , sed à variis & distinctis eorum locis oriantur fibræ nerveæ.

XXII. Non nisi per nervos à partibus ad emporium propagari posse impressiones in organis sensuum externorum factas jure colligitur non tantum ex sensûs eclipsi , quæ ligato , vel secto , vel resoluta nervo parti prospiciente succedit ; verum etiam ex eo quod à cerebro , cerebello , medullâ oblongatâ , & spinali nihil aliud ad partes præter nervos amandetur. Sed quonam mechanismo per memoratas vias illa fit transmissio ? Anceps hic hæret animus. Si spiritibus à commotis nerveis sensuum externorum fibris ad emporium per nervos refluentibus illam quis adscribat , ei demonstranda 1^o Incumbit continua fibrarum nervearum cavitas , quæ spiritibus permittat eâ celeritate ad commune sensorium refluere , quâ objecta , sensibilia , vix presentia , percipit anima , & quâ proinde ab illis indita sensibus externis impressio ad memoratum sensorium transmittitur. An ex *Lewenockii* observatione Microscopio peractâ nervos cavitate manifestâ donatos esse colligeret (*a*) ? An sensibilem

nervo optico inesse cavitatem cum *Salzmanno* putaret (a)? An eidem, ac olfactorio nervo cavitatem adesse sensibus obviam ex *Glissonii*, & *Charletoni* experimentis inferret (b)? Sed certam fidem illis adjicere non sinunt *Graaffii*, *Vieussenii*, aliorumque anatomicorum experimenta (c), qui arte nullâ sensibilem in nervis cavitatem detegere potuerunt. An poris, & meatibus, quasi totidem contiguus alveolis, instructam cum *Willisio* dices nervorum compagem, cannæ indicæ instar (d)? Verum nonne celeriori illa obstaret spirituum refluxui impressionibus celeriter transmittendis necessario? 2° Spirituum existentiam invictis comprobet argumentis, à posteriori saltem, si non à priori, deductis, quam ut plane dubiam non pauci rejiciunt. 3° Concipiat quomodo uno, eodemque tempore per unum, eundemque nervum fieri possint duo prorsus oppositi motus animalis œconomix legibus repugnantes, spirituum scilicet influxus, & refluxus, qui sæpius tamen essent admittendi, cum uno, eodemque tempore sentiat, & moveatur eadem pars. An vel fibrillas nervæ arteriosas spiritus ad partes vehementes,

(a) *Salzm. obs. anat. p. 71.*

(b) *Gliss. anat. hep. Charlet in Bib. an. T. 2 p. 61.*

(c) *Graaff. de succ. paner. Vieuss. de nerv.*

(d) *Will. anat. cereb. cap. 19 Vieuss. de nerv.*

& venosas eos revehentes , vel nervos ad sensum à nervis motui servientibus distinctos admitteres ? Id sane gratuito , nec adhuc confirmante autopsiâ anatomicâ supponeretur.

4^o Dolorificam fore quamlibet sensationem fateri cogetur ; cum nonnisi à violentâ ob-jectorum actione induci posset spirituum re-fluxus eorundem influxum superans : unde validior exurgeret fibrarum emporii motus dolorificas excitaturus sensationes. Num in re tam arduâ , cujus sub cineribus alte se-pulta delitescit enodatio , suspicari liceret cum non paucis impressum nerveis sentuum externorum fibris motum tremulâ & vibra-toriâ earundem motionem per totum earum tractum diffundi , & ad continuas emporii fibras transmitti ? Id saltem innuere videntur partium sensibilitas eò magis obrusa , quò minùs vibratiles evadunt earum nervi , si à sero collecto laxentur , ut in œdemate ; acu-tior earum sensus , quò tensæ magis & vi-bratiliores evadunt ; summaque nervorum mollities , quò propiores ortui sunt , ut nervus olfactorius , nervi optici , & rami septimi paris auditorii , quorum mollities multò major est , quàm in illis , qui lon-giùs ab ortu exporriguntur , & quæ eo fine sic ordinata videtur , ut molliter desinens fibrarum nervearum emporio propiorum vi-bratio fibras illius minùs concutiat , & ani-

nam vividius non afficiat, dum illis inducitur impressio, validior præsertim. Neque ob nativam suam mollitiem vibrationibus edendis penitus impares censeantur fibræ nerveæ; cum illis edendis pares eas offerat earundem elasticitas, quam comprobatur mutua retractio extremorum nervi secti (a), & quæ in nervorum origine, in cerebri nempe medullâ, observata etiam fuit (b). Si memorata fibrarum nervearum mollities non obstat fibrarum nervearum per organa sensuum externorum dispersarum vibrationi necessariae, ut motu tremulo illis ab objectis impresso urgeantur spiritus versus cerebrum refluxuri, in hypotesi eorundem refluxûs; cur ejusdem vibrationis transmissioni per totum earum tractum obstarer? Propositam hypotesin concutit equidem, sed non penitus evertit nuperum *Halleri* experimentum, qui nervo irritato, advocatâque sic contractione muscoli, cui prospiciebat, tum propriis sensibus, tum adhibitâ eximiâ arte nullum in irritato nervo motum detegere potuit (c). Ex illo enim nullatenus sequitur

[a] Quæst. Med. Paris. disc. ann. 1749. sub. D. Baron, an nondum probati spir. anim. § V. & Girard. de Vill. quæst. Med. paris. ann. 1757. an ut sensib. sit irrit. a nerv §. 4.

(b) Baron ibid.

(c) Hall. exp. sur la sensib. Journ. de Med. Juillet 1756. pag. 131.

nervos elasticitate destitui suscipiendis & transmittendis idoneâ ; cum memoratis illa jam comprobata fuerit experimentis , & amplius elucescat ex eo quod lecto nervo , ejusque irritatâ parte superiori cum cerebro communicante sublultus , & retractio sensibilibiter in ejus extremo appareant , quod crispari , & abbreviari videtur (*a*). Id duntaxat ex *Halleri* experimento colligendum impressum nervis motum , nec motibus contractilibus , quos vis nervea producit in musculis , parem esse ; nec similem esse impresso motui chordis musicis , quæ sensibilibiter , & secundum se totæ moventur , sed aliquatenus dissimilem , cum nervi non secundum se toti , sed eorum duntaxat fibræ nerveæ insensibilibiter moveantur ; nec sufficere constringendis arteriis , quas non paucos circumligare plexus nerveos anatome docet ; quâ teste utramque arteriam axillarem circum ligant nervi intercostales (*b*) ; arteria hepatica nerveis fibris reticulum æmulantibus circumligata est (*c*) ; renum vasa circumplectuntur fibræ nervi intercostalis (*d*) ; arteriam pulmonarem instar annuli cingunt fibrillæ nerveæ oriundæ à ramo emissio à plexu cardiaco superiori (*e*) ;

(*a*) Lorry exp. sur l'irrit. ibid. Janvier 1757. p. 9.

(*b*) Vieuss. de nerv. cap. 5.

(*c*) Ibid.

(*d*) Ibid.

(*e*) Ibid.

sanguifera splenis vasa obligant funiculi nervei plexûs lienaris (a); vasa mesenterica pluribus in locis superascendunt, varièque circumligant funiculi nervei plexûs mesenterici superioris [b]; truncus arteriæ carotidis internæ, vena jugularis interna, & nervus intercostalis simul continentur in capsulâ cellulari; & cum arteriâ carotide ferine ligatur ille nervus (c); arteriam subclaviam, celiacam, hepaticam, splenicam, renalem, & venam portam circumligant fibræ nervi intercostalis [d]; arteriam mesocolicam (e), temporalem, vertebralem, brachialem, aliasque benemultas circumplicant plexus nervei (f). Quasi totidem habenas nerveas pro animæ imperio tum voluntario, tum naturali, laxandas aut stringendas non pauci cum *Hallero* habuere plexus illos nerveos, qui modò concussionibus validioribus agitati arterias, quas circumligant, premendo, sanguinis cursum accelerant; modò nimium contracti eas ita stringunt, ut sanguinis cursum imminuere, vel sistere valeant [g]. Sed re maturius perpensâ hanc prius admissam sententiam deseruit

(a) ibid.

[b] Ibid.

[c] Winsl. trait. des nerf. § 119. 375.

[d] Winsl. ibid. § 383. 404. 406. 408.

[e] Hall. phil. T. 1 p. 70.

[f] Hall. præl. § 573. litt. a.

(g) Hall. præl. ibid. & § 616. litt. r.



Hallerus, novis experimentis convictus nullum nervis competere motum, saltem sensibilem, & constringendis interjectis arteriis parem. (a).

XXIII. Præviam organorum corporeorum motionem non minùs supponit objectorum absentium, sed priùs cognitorum perceptio, imaginationis, vel phantasie nomine cognita, nec aliunde reperenda quàm à renovato eodem motu fibrarum emporii, quem antea presentia excitaverant objecta illa impressione nerveis sensuum externorum fibris inductâ, & ad sensorii communis fibras transmissâ; & qui consequenter ad oscillationem arteriarum his fibris vicinarum, & in eas impingentium, ut in somniis, vel ipsius animæ nutu renovatus objecta priùs cognita, licèt jam absenria, humanæ menti offert, & ad sensuum externorum organa reflectitur ac dirigitur, ut innuunt excitata venerea tentigo, æstûs aphrodisiaci concitans flammæ, animæ oblata idea objecti priùs cogniti, veneris lenocinia ei exhibente; sicut & constrictio, motusvè quidam in nervis organi gustûs inductus, quem uberior sequitur salivæ proventus, dum sapidi & grati cujusdam edulii, etsi absentis, idea exhibetur humanæ menti. Pro debiliori, vel vividiori fibrarum emporii motionem, à quâ dependent oblata object-

(a) Hall. exp. sur la sensib. Journ. de Juillet 1736, pag. 14. 15.

eorum absentium imagines , quæ idææ vocantur , obscuræ illæ sunt , aut claræ.

XXIV. Uno , eodemque modo de unâ , eâdemque re , neque idem homo , neque homines diversi semper ratiocinantur. An illa refunderetur ratiocinii diversitas in animam , quæ eadem semper est , ac veritatem nunquam non prosequitur ? Numne potius in diversam organorum corporeorum dispositionem , quæ quotidie , aut facile in eodem homine immutari potest , quæ in variis hominibus diversa existit , & quæ variè immutata , & læsa ratiocinium multifariam pervertit in deliriis ? A certâ igitur quâdam fibrarum emporii motione repetendum ratiocinium , actus nempe mentis , quo duæ invicem comparantur idææ , quin tamen cum unâ tertiâ conjungantur , verisimiliter sobolescens ex eo quòd motæ duæ emporii fibræ , tum ipsius animæ nura , tum ab arteriarum fibris illis vicinarum oscillatione , ideas duas animæ representent , quas consonas , aut dissonas illa deprehendit objectis , quæ ab illis fibris exhibentur , prout eadem moventur cum modificatione eâdem , aut dissimili ei , quam illis impresserant objecta illa.

XXV. Tres simul vibrari necesse est emporii fibras , ut eliciatur iudicium , actus nempe mentis , quo cognoscitur respectus

existens inter binas idéas , mediante tertiâ ; quarum una subjectum , alia attributum , seu prædicatum , ac tertia nexum duo illa extrema unientem exhibet , ad hoc ut anima prædicatum cum subjecto per copulam unienis prædicando affirmer , aut utrumque interjecto medio disjungens judicando neget : unde judicii divisio emergit in affirmativum , & negativum. Primum resultat ex synchronâ vibratione duarum emporii fibrarum , quâ idéas ab iis oblatas jungit anima mediante motione simultaneâ alterius fibræ , quæ copulam exhibet. Posterius exurgit è vibratione duarum fibrarum ætherochronarum , quâ idéas ab illis oblatas separat humana mens , impati simul agitâtâ motu aliâ emporii fibrâ , quàm ut nexum illi valeat exhibere.

XXVI. Iterata contingat , & simultanea motio fibrarum emporii , quæ animæ simul representent objecti antea cogniti , loci , temporis , & aliarum circumstantiarum ad illud spectantium idéas , animæ jam prius oblatas ; & quæ multoties , aut unâ dumtaxat vice sed validè vibratæ , talem adeptæ fuerant tensionis gradum , ut animæ nutu , vel oscillatione arteriarum illis vicinarum denuo vibrari queant , memoria exurget , seu reminiscencia.

XXVII. Essentiam perpende voluntatis animæ , quæ ab *Aristotele* definiebatur ,

Appetitus boni cum ratione conjuncta, quia nemo vult prater quàm quod suspicatur esse bonum [a]; & quæ nuper definita fuit, *Inclinatio animæ ad aliquod objectum, pro ratione boni in eo distinctè percepti* (b). Ad duas attende illius species. Una sese offeret, voluntas electionis, seu ab electione vocata (c): alia occurret, voluntas necessitatis, seu ab instinctu (d). Illam vigilantibus nobis lucere, & in solis rationem habentibus vigere post *Scaligerum* aiebat *Andreas Laurentius* (e). Hæc in dormientibus, & brutis viget [f]. Libera est prior voluntatis species, & boni cujusdam opinione per consultationem ductâ, quod bonum est ac utile, seligit, ut advertit *Fernelius*, qui idcirco & electionem, & consilii facultatem illam appellat [g], eò potiori jure, quòd non simplici & purâ voluntate, quod bonum & utile existimatum est, eligat appetitus rationalis, sed eâ quæ bono consilio, & deliberatione confirmata est [h], quàm

[a] Arist. lib. 10 rhet. cap. 10.

[b] Sauv. phis. p. 153: & Pathol. p. 15.

[c] Andr. lavr. anat. lib. 5 cap. 5 & lib. 9 quæst. 19.

[d] Ibid. lib. 9 quæst. 19.

[e] Ibid.

[f] Ibid.

[g] Ibid. lib. 5. cap. XI.

[h] Ibid. lib. 6. cap. 14.

ideo voluntatem quoque liberam ille vocat [a], & quæ à Borello definita fuit, *Electio & motus quo tendimus ad bonum apprehensum, & averſamur à malo præcognito* [b]. Nec cum libertate illa confundatur, ut monuit vir clarissimus (c). Hæc enim voluntatis species motum illum præ alio, ideam illam præ aliâ duntaxat suadet, animamque inclinat ad hunc præ alio motum edendum, & ad unam præ alterâ ideam arripiendam, aut dimittendam; libertas è contra in suo conceptu importat inhærentem animæ facultatem agendi ex pluribus possibilibus illud, quod ratione duce optimum cenſetur, & ideo definita fuit, præcipua facultas animæ suafum à voluntate motum exequens, & indicatam ab eâdem ideam arripiens ac retinens, vel dimittens (d). Posterior voluntatis species, seu voluntas necessitatis, aut ab instinctu, nec consilii, nec electionis est, pueris ac belluis non denegata [e], talisque existit, ut absque electione ad bonum apprehensum tendat, aut à malo præcognito averſetur anima ab ideis boni sectandi, vel mali fugiendi determinata. Duplicem hanc voluntatis speciem genuinis coloribus jam dudum adumbraverat

[a] ibid. lib. 5. cap. 9.


[b] Borell. de mot. anim. part. 2. p.op. 78.

[c] Sauvag. nat. rediv. § 67.

[d] Sauv. ibid.

(e) Arist. lib. 3. ethic. cap. 2.

Aristoteles, dum dixit: *Eorum quæ voluntaria sunt, partim consultò, partim inconsulte facimus. Consultò, cum antegressa est deliberatio; inconsulte, cum non est antegressa deliberatio* (a). Ab ideis clavis & distinctis voluntas electionis, ab ideis confusis voluntas necessitatis excitatur. Sat vividam illæ supponunt fibrarum emporii motionem à proportionali impressione in parte evidenter sensibili factâ oriundam. Debilem hæc arguunt illarum motum ab editâ impressione in parte sensu donatâ obscuriori, vel non manifesto sobolescentem. Ab organorum corporeorum motu procedit ergo utraque voluntatis species.



CAPUT SECUNDUM.

De animæ in corpus imperio.

XXVIII. **I**NSITUM nobis, & singulari Dei benignitate homini concessum intus inhærere principium, multiplices edens in humano corpore motus, tum ad sanitatis tutelam, tum ad ægritudinis medelam frequentius occurrentes, vel etiam toto vitæ decursu perennantes, evincunt infiniti propemodum motus intus & extus, hîc & ubivis obvii, atque sine ullâ principii externi actione eden-

di, quos ideo activos verè dixeris, de quibus hic agitur.

XXIX. Verùm an penes animam stet, an corpori illud inhæreat principium, sibi non magis consentiunt clarissimi in arte viri, quàm de finibus imperii mentis humanæ in corpus, quos nimium circumscribunt plerique, proferunt alii.

XXX. Vulgatissima jamdudum viguit motuum corporis humani divisio in voluntarios, seu arbitrarios, in plane mechanicos, seu automaticos, & in mixtos, non alia innixa fundamento, nisi quòd 1^o ab animæ arbitrio ita procedant partium nonnullarum motiones, artuum v. g. capitis, colli, genarum, palpebrarum, linguæ &c. ut volitionum animæ celeritatem adæquent. 2^o Quòd absque ullo voluntatis, saltem electivæ, concursu ita edantur aliarum nonnullarum partium motus, ut penes animæ arbitrium non sit eos adaugere, imminuere, accelerare, retardare, sistere, erigere, vel coercere; quales sunt cordis, vasorum sanguiferorum, ventriculi, intestinorum, aliarumque nonnullarum partium motiones. 3^o Quòd tales alii sint in humano corpore motus, ut independenter ab animæ nutu fieri quidem soleant, possintque tamen pro illius arbitrio variè immutari, ac penitus etiam sisti, v. g. respiratio.

XXXI. At nulla in humano corpore fieri potest motio pure mechanica, solâque partium illius dispositione, ac independenter ab animâ; eoque jam venit rejicienda titulo memorata motuum divisio.

XXXII. Quamvis enim is sit partium solidarum corporis apparatus, qui passim in illo multiplices exhibeat machinas, ut fulcimenta in pedibus, trabes in costis & ossibus ilium, cuneos in dentibus caninis, alveos in cordis auriculis & ventriculis, vectes in omnibus ossibus longis, folles in pulmonibus, cribrorum species in vasis secretoriis, antheliam in corde, hypomochlia in majoribus trochanteribus, canales in vasis omnibus, columnas, trochleas, aliasque machinas varias; & quamvis proinde motus earum mechanicos esse, ac juxta leges mechanicas edendos illos esse diffiteri nequeat ille qui novit mechanicum esse omnium machinarum effectum, nullum tamen à machinis illis solâ illarum dispositione edi posse in humano corpore motum absque animæ concursu, easque nullum posse motum edere, nisi eis applicetur potentia motrix, aut ab eâ causa movens ad illas mittatur, fateri quisque cogetur. Hanc autem frustra quæreret potentiam motricem in corpore, & non alibi quàm in animâ inveniet. 1^o Enim inertes tandiu sunt corporis machinæ, quandiu non accē-

Est causa motrix, quam corpori non inhærere novit ille, quem non latet nulla potentiae activae indicia præbere illius organa, dum quiescunt; atque patientis potius, quam agentis illa vices obire, dum etiam moventur.

2° Nullum in ovo fœcundato motum prius habent embryonis organa, quam ejus corpori unita fuerit anima. Si vis illis deficiat ante corporis & animæ unionem, quâ in iisdem motus incipiat; quomodò plus in illis supponeretur virtutis, unde in motu semel incæpto perseverarent reliquo vitæ decursu. Tandem si verum sit ex mechanicis motum semel machinis impressum prennem esse non posse absque novâ potentiae motricis applicatione, vel jugiter adhibitâ, vel identidem & tempestivè repetitâ, concludendum est motum corporis humani machinis in vitæ primordiis inditum per reliquum ejusdem tractum perseverare non posse absque motore jugiter presente, earumque motiones perennante. Cum enim jugiter imminuendæ illæ veniant à resistentiis omni vitæ momento offerendis & superandis, citò illæ destruerentur, nisi continuò presens esset motor, cujus vires eâ proportionem increcant, quâ vincendæ adaugentur resistentiæ, tantumque motus illis rursus imprimant, quantum ad superandas illas resistentias amittere. An autem talis in corpore sese offert motor?

Numne in animâ residere potentiam motricem, quâ moveri incipiant, & toto vitæ decursu in motu perseverent memoratæ machinæ, suadet non prius incipiens organorum corporis motus, quàm illi unita fuerit anima, protinusque succedens illius eclipsis eâ avo-
lante. Nemo profecto ignorat, ut ait Borellus, quòd principium & causa effectiva motuum sit anima, cum animantia per animam vivant, & durante vitâ motus in eis perseveret; extincto verò animali, id est non amplius animâ operante, machina animalis omnino iners & immobilis relinquitur (a).

XXXIII. Si automatica quædam vigere in humano corpore motio, talis præsertim esset cordis motus, qui nobis insciis, & sive velimus, sive nolimus, indefinenter perdurat. Ad quamnam autem partium dispositionem confugeret, qui perennem & alternantem cordis motum omni penitus animæ imperio liberum putaret? An ad perfectam recurreret fibrarum illius elasticitatem, quæ gratis supponitur, & obeundis illius motibus impar foret, etsi talis adesset, ut invictè probavit vir clarissimus (b)? An ad vim fluidi nervei in cordis fibras influentis, quam illis perennandis, non minùs imparem

(a) Borell de mot. anim. part. I. Cap. I.

(b) Sauvag. de nat. rec. § 59. 60, 61, 62, nov. circul. hist. § 74. 75. 76.

esse ex eodem patet [*a*] ? An excogitarem à non paucis alternantem nervorum cardiaco-
rum compressionem respiceret tanquam cau-
sam alternantis cordis motûs ? Verùm sup-
positæ compressioni non parent cordis auri-
culæ ; eodem tamen alternanti illæ aguntur
motu , ac ventriculi. Mollior est nervis illis
ab arteriarum majorum distensione inducenda
compressio , quàm ut advenientem per illos
causam motûs cordis intercipere valeat. Al-
ternæ tandem cordis vices sibi succedunt in
piscibus , frigidisque animalibus , quibus unica
est arteria , cujus proinde distensio memora-
tam nequit inducere nervorum compressio-
nem (*b*). An sufficientem diceret refluxum
sanguinis ad cava ventriculorum cordis , eos
diducentis , eorumque vim elasticam & con-
tractilem suscitantis ? Sed ab ingenti attrituum
numero , à directionum diversitate , à vaso-
rum renixu , superficierum multiplicatione ,
aliisque benemultis resistentiis sanguini in cursu
suo objiciendis , ita ejusdem ad cor refu-
xuri motus infringendus est , ut per venas
ad cor redux vires obtineat iis multò infe-
riores , quæ illi fuerant impressæ à corde
cum projiciente ; adeo ut brevi suffaminanda
foret cordis motio , si à tali causa depende-

(*a*) Sauv. nat. red. § 48. diff. de Hemipl. p. 131

(*b*) Hall. phil. T. 1. p 504.

ret, demonstrante Professore clarissimo [a]. Si à Cerebello, firmiorem obtinente contextum, minùsque comprimendo, quàm cerebrum, ac munia implente vitæ tam necessaria, ut certum ac promptum lethum por- tendat notabilis illius læsio, quod nec tam certò, nec tam citò à cerebri læsione immineret, per nervos ab illo oriundos cordi prospicientes ad hujus fibras è Cerebello venire dicat causam motûs ejusdem, à cerebro per nervos ab eo sobolescentes depluente causâ motuum voluntati subditorum, inani quoque lactabitur spe. Firmioris enim contextûs non esse Cerebellum, nec compressioni minùs obnoxium, quàm cerebrum, iteratis ac certis comprobatum fuit experimentis [b]. Cerebelli læsiones, etiam notabiles, totalemque destructionem non semper secuta fuit motuum vitalium eclipsis; dum è contra cerebri læsiones, illibato etiam Cerebello, motuum vitalium, ipsiusque vitæ extinctionem non semel traxere [c]. Autopsiæ demum anatomicæ repugnat supposita distinctio ortûs nervorum motibus prorsus mechanicis, seu involuntariis prospicientium, qui è solo Cerebello finguntur oriri, & nervorum motibus

(a) Sauv. nat. rediv. § 59. 60. 61. nov. circ. hist. § 74. 75.

[b] Hall. phis. T. I p. 476.

(c) Hall, ibid. p. 474. 477, & pial. § 60. lit. a.

arbitrariis inservientium, quos à solo cerebro oriri supponunt non pauci. 1^o Quippe non ed potuit adhuc anatome pervenire, ut unum posset demonstrare nervum è solo Cerebello oriundum. Liquet è contra ex conjunctis cerebri, & Cerebelli pedunculis medullofis fibras mutuari nervos omnes à capite exporrigendos, tam partibus motu vitali agendis, quàm voluntati parentibus, prospicientes, nullumque ex illis esse, qui & à cerebro, & Cerebello fibras non mu-
tuetur, si olfactorium exceperis ex uno cerebro oriundum. 2^o Non minùs compertum est nervos motibus vitalibus famulantes fibras à cerebro accipere; aliosque, qui è Cerebello supponuntur oriri, motibus vitalibus inservire. Numne siquidem nervus recurrens ab octavo pari oriundus, quod à Cerebello complures oriri putant, musculorum glotidis contractioni servit, quos ad libitum contrahit homo? Numne nervus intercostalis, quem è Cerebello censent oriundum, & qui in ischiadicum magnum terminatur, ad membra voluntati subdita, sicut & ad organa vitalia disseminatur? Numne tertium, quàrtum, & quintum par nervorum, sicut & pars mollis septimi paris, quæ benemultas à Willisio hujus hypotesis fautore dicuntur fibras nerveas à Cerebello mutuari, musculis voluntati subditis, sicut & sensuum organis, non verò

organis vitalibus prospiciunt? Numne ad pharyngem, & laryngem, quæ animæ nutui parent, fibras nerveas diffeminat octavum par? Alia tandem invicta vide apud *Hallerum* ex anatome petita experimenta, quibus aperte liquet nervos è solo ferme Cerebello oriri suppositos longe maximam ramorum partem ad motuum arbitrariorum, & sensuum organa mittere, multòque minori numero ramos elargiri partibus, quæ soli vitæ serviunt; ac nullum omnino existere nervum, qui organis vitalibus dumtaxat serviat, & qui insignem non emittat ramorum portionem ad partes, quæ animæ nutui parent (a).

XXXIV. Superstites à morte non paucos organorum corporeorum motus probant non tantum è frigidis, calidisque animalibus deprompta exempla (IX), aliaque experimenta, quibus liquet in mortuis felibus, cuniculis, aliisque variis animalibus conspicuum & evidentem fuisse vermicularem intestinorum motum; verum & superstes cordis humani motus post sublato corporis & animæ nexus (VII), motusque intestinorum peristalticus, quem in homine triduo integro à morte superfuisse colligit *Hallerus* ex succedente tunc chili transfluxu in vasa lactea (b). An tamen à

(a) Hall. phil. T. 1. p. 478.

[b] Hall. præl. § 93.

superstitibus illis motibus post mortem colligendum foret, quosdam in organis corporeis hominis viventis edi posse motus activos solâ eorum dispositione, & absque ullo animæ concursu? Neutiquam. Irritabilitatis enim illi sunt effectus, ac proinde non confundendi cum organorum corporeorum motionibus à vitâ individuâ (X).

XXXV. Cum ergo solâ corporeorum organorum dispositione nullus possit in humano corpore produci motus (XXII); & cum corpore, simul ac animâ invicem unitis constet homo, superest ut in animam quilibet refundantur edendi motus activi in humano corpore; ac penes eam residere concludatur facultatem motricem, potentiam nempe musculos contrahendi, & partes omnes movendi: quemadmodum *Hipocrati* corporis humani gubernacula jamdudum animæ tribuenti placuerat (a), cujus opinioni non tantum adstipulabantur *Galenus*, aliique priscei medicinæ proceres (b), verum & calculum

[a] Anima, etiam dum corpus quiescit, vigilet, & cunctas Corporis partes perlustrans habitaculum suum gubernat, & omnia ejus obit munia (*Hip. lib. de insomn.*)

(b) Gal. de nat. fac. lib. 1. cap. 1, & de anat. viv. p. 57. Aristot. lib. 2. de animâ.

adjiciunt eorum nepotes non pauci (a).

XXXVI. Etsi nullis circumscribendum finibus inde sequatur animæ jus, & imperium in corpus cui unitur, ac singulas illius partium motiones activas, eas tamen omnes tanquam liberas & voluntarias, seu ab animæ nutu prorsus dependentes respicere piaculum foret. Absque animæ siquidem consensu, imo & eâ non advertente motus eduntur cordis, organorum sanguiferorum, partium thoracis respirationi famulantium, intestinorum, ventriculi, ductuum secretoriorum, aliarumque nonnullarum partium; cum eos nequeat animæ libertas accelerare, retardare, adaugere, minuere, vel sistere, si respirationem excipias, quæ est actio mixta. Omnium ergo indiscriminatim partium, ipsiusque cordis, motus animæ voluntati subjiciant *Stalhiæ* affectuæ, quandiu voluerint. Refragabimur cum eorum non paucis, qui omnes omnino corporis partes animæ subjiciunt. Et certe ubi nec sensatio datur, nec apprehensio, nec proinde electio boni, aut fuga mali, nequit adesse actus volitionis animæ, electio nimirum & motus, quo tendimus ad bonum ap-

(a) Gorr. defin. med. p. 364. Fernel. phis. lib. 5. cap. 2. Laurent. anat. lib. 9. quæst. 7. Borell. de mot. anim. part. 1. cap. 1, & part. 2. prop. 30. Bagliv. prax. med. lib. 1. cap. 1. p. 166. Bellin. de miss. sang. prop. 4. Lancis. de motu cord. postul. 30. Tabôr, SWamerdam, Schal. 3. Portefields apud Hall. præl. 6. 339. lib. c. Sauvag. ubivis. Lamure dist. de Respir.

prehensum, aut à malo præcognito averſamur (a), ac proinde ad agendum determinari non poteſt libertas. Verùm in vitæ primordiis nulla poteſt eſſe perceptio, & apprehenſio, quâ determinetur libertas ad cor movendum, cum priùs conſpiciatur moveri cor, quàm ſenſibilia appareant capitis deliſſeamenta, in quo reſidet emporium; nullâque proinde poſſit in animâ excitari idea clara, quæ voluntatem & libertatem invitet ad motus edendos. Motus ergo qui ſub puncti ſalientis facie ſeſe primò in embryo prodiſt, liber eſſe nequit & voluntarius. Nec liber eſſe poteſt cordis motus in adulto, ut pote quem penes animæ libertatem non eſt modificari, ac præſertim ſi verum ſit nullum, aut obtuſiorem eſſe cordis ſentum [XIV], quàm ut fibris illius inducenda impreſſio diſtinctam valeat in humanâ mente ideam excitare neceſſariam, ad hoc ut determinetur libertas ad voluntarios edendos motus.

XXXVII. Neque directum, & voluntarium, ſed mediatum dumtaxat & indirectum animæ juſ in cordis motum comprobatur exemplum *Chiliarchi Townſhend*, qui, referente *Cheyne*, quaſi mortuus abſque motu & pulſu pro nutu jacebat, cui, ut pote unico, & unanimi omnium ſæculorum experientia contra-

(a) Boſcell, de mot. anim. part. 2. prop. 789

rio nihil tribuendum credidit *Hallerus* (*a*).
 Si aliquid in eâ historiâ veri est [*b*]. Præter
 enim quòd eum voluntariâ , & liberâ animæ
 facultate cordis motum non suspendisse non
 ita pridem pronuntiavit quidam : sed quia ,
 dum cordis & arteriarum pulsationem ille vo-
 lebat intercipere , supino situ jacebat , quo
 ita comprimere noverat sinistram cordis au-
 riculam , ut interrumperetur exinde liber san-
 guinis à pulmonibus ad illam , & ex illâ ad
 subjectum ventriculum commeatus (*c*); ac-
 cedit adhuc variis respiratori mutationibus
 inductis immutari quoque cordis motus. Res-
 piratio aurem est actio mixta , quam pro ani-
 mæ nutu variè modulari valet homo. In-
 crescente , ac acceleratâ respiratione quanti-
 tate uberiori & velocitate majori à pulmo-
 nibus ad cor remeat sanguis. Intenditur tunc
 stimulus à sanguine cordis fibris inducendus ,
 & naturam determinans ad ingeminandos cor-
 dis motus. Segnescentem & lentiores res-
 pirationem ratione contrariâ sequentur immi-
 nuti ac rariores in corde motus. Illa demum
 si interrumpatur , & sanguinis exinde inter-
 cipiatur à vasis pulmonaribus ad cor refluxus ,
 defectu stimuli sufficientis ita languebit cor-
 dis motus , ut insensibilem illum reddere

(*a*) Hall. præl. §. 190. lit. c.

(*b*) Hall. phis. T. 1. p 483.

(*c*) Bond. essai sur le cochemarr.

possit, qui respirationem penitus fere cohibere pro nutu suo noverit, ut chiliarcho contingere potuit. Id ipsum, quod ratio suadet, experientia confirmat. Nunquid enim teste *Camerrario*, solo anhelitu retento pulsum insensibilem reddere noverat impostor [a]? Numquid in se ipso expertus est *Neukrans* inspirando pulsum accelerari, in expiratione verò retardari (b)? Numne perpetuâ flatûs impulsione vidit *Hallerus* revocari cordis motum, qui quieverat (c), quem non minùs restitutum fuisse variis constat experimentis aëre in pulmones per nares, aut trachæam arteriam insufflato, quo non semel vitæ restituta sunt animalia varia suffocata, aquis merfa, aliisque infortuniis morti proxima [d]? Numne patet ex *Baglivio* solâ respiratione sanguinis effluxum ex inflictio abdomini vulnere circa dextrum inguen ita moderasse juvenem quemdam, ut eâ suppressâ supprimeretur sanguinis effluxus, eâ laxatâ ille laxaretur [e]? Quid plura? Numne ea sufficiunt ad concludendum spiritui pro nutu cohibendo sensim assuefactum chiliarchum sensim novisse modum interrumpendi sensibi-

(a) Mem. med. cent. 1 apud Hall. præl. § 615. litt. u.

(b) Apud Hall. Ibid.

(c) Hall. præl. § 103.

(d) Malpig. epist. ad Borell. Thrust. Diatr. de resp. Alique apud Hall. præl. § 604. litt. b.

(e) Bagl. op. med. p. 458.

lem cordis motum , cujus proinde interrup-
tio non ab animæ arbitrio directæ & imme-
diatæ , sed indirectæ duntaxat & mediante
respiratione pendebar.

XXXVIII. E variis corporis humani mo-
tibus activis nullus est , qui solâ organorum
illius dispositione edatur [XXII]. Quo-
quot illi sunt , ab animâ dependent [XXIII].
Cum autem ii omnes ab animæ arbitrio
non pendeant ; sed eos inter alii ab ani-
mæ nutu procedant , alii verò absque libero
animæ consensu peragantur (XXX), duplicis
speciei distinguenda est facultas motrix animæ
inhærens : una nimirum quâ pro nutu suo
varios anima in humano corpore motus exe-
quitur , quos voluntas suadet [XXVI] , &
quam vocaverant antiqui facultatem anima-
lem ; altera verò , effectibus conspicuis
duntaxat dignoscenda , quæ facultas natu-
ralis , seu natura vocata fuit ab artis pro-
ceribus.

XXXIX. Quamvis enim una sit animæ
essentia , sensibusque obvia illa esse nequeat,
diversas tamen ei vires inesse non minùs
dignoscitur ex operibus variis , quæ pro-
ducit , quàm ex effectibus conspicuis dig-
nosci solent causæ , quantumvis reconditæ ,
ut subodoravit *Fernelius* (a) ; cui assensum
ille non denegabit , qui plurimis advertens

(a) Fernel. phil. lib. 5. cap. 2

animam sese prodere operibus, quæ sensibilibus effectibus innotescunt, varias animæ facultates inhærere noscet, quarum nomina non animæ essentia, sed viribus ab eâ manantibus cum *Fernelio* aptabit (*). Unde siquidem orta facultatum, seu potentiarum hætenus animæ adscriptarum divisio, & nomina, nisi ab effectibus variis ex illâ manantibus; ita ut sua, & diversa pro quolibet effectu specie diverso ab animâ procedente facultas ei tribuatur; neque uni, eidemque facultati diversa, aut variis facultatibus eadem adscribantur nomina. Numquid hinc factum fuit, ut imaginationis, ratiocinii, iudicii, memoriæ, voluntatis, & libertatis nominibus donatæ fuerint variæ animæ potentiæ pro diversis effectibus, qui ab illâ procedunt? Quidni ergo si dentur in humano corpore effectus ab eâ manantes, & à memoratis ejusdem potentiis nullatenus procedentes, peculiaris non admitteretur in animâ facultas, à quo producuntur, & nomen proprium illa non sortiretur? Cum autem non pauci in humano corpore motus edantur ab animâ quidem, sed non ab ejus arbitrio procedentes [XXXV. XXXVI], peculiari certè nomine donanda animæ potentia, à quâ hi eduntur. Potentiam illam distinguentes artis protoparentes ab animali

(*) Ibid,

facultate, quæ animæ nomen apud illos nonnunquam retinuit, & à quâ motus arbitrarii pendent, naturam appellavere, seu facultatem naturalem, ut patet ex *Gal.* qui cordis motum à naturâ, id est à facultate naturali, thoracis verò motiones ab animâ, id est ab animali facultate edi, probat (a); & qui animal ab animâ, simul & naturâ gubernari profert (b); ideoque pronuntiaverat facultatem naturalem citra nostram electionem, actiones verò animales secundum voluntatem nostram perfici [c]. Nihil aliud *Andrea Laurentio* audiebat natura, seu memorata animæ facultas motrix, quàm anima, vel facultas voluntaria necessitate actionis stimulata, nec à voluntate necessitatis diversa (d); eaque non ineptè definiri posset animæ potentia motrix, quâ sine voluntatis electivæ concursu, ipsâque non advertente animâ varii eduntur in humano corpore motus sanitatis tutelæ, ac ægritudinis medelæ servientes.

XL. Hinc 1^o Tanquam principium immateriale, ac sub specie certæ cujusdam animæ facultatis, aut potentiæ omnes exequentis corporis motus præter voluntarios, multò potiori jure hic exhibetur natura, quàm quasi quid materiale, corpori nostro prorsus inhæ-

(a) *Gal.* de usu part. lib. 7. cap. 9:

(b) *Gal.* de nat. fac. lib. 1. cap. 1.

(c) *Gal.* de voc. instrum. dissect. cap. 22

(d) *Laurent.* anat. lib. 9. quest. 19.

rens, & animæ nullatenus subiectum, contra non paucos, qui motu mere mechanico, & absque animæ concursu edi credentes non paucos corporis humani motus, naturæ nomine nihil habebant, quàm vim quamdam à certâ quâdam partium illius dispositione exurgentem (a).

XLI. Hinc 2^o Emergit motuum corporeorum divisio in liberos, in naturales, & in mixtos. 1^o Liberi dicuntur, aut voluntarii, seu arbitrarii, qui à libertate adeo procedunt, ut eos pro nutu suo accelerare, retardare, adaugere, minuere, vel sistere valeat anima; quales sunt artuum, capitis, colli, linguæ, genarum &c. motus. 2^o Naturales illi sunt, seu involuntarii, quos exequitur natura ab ideis confusis boni vel mali determinata, & qui adeo parum voluntarii existunt, ut ex naturæ instituto, & necessitatis sensu omni animali insito, atque independenter à voluntatis electivæ concursu, ipsâque non advertente animâ edantur, quod sane non repugnat, tum quia contradictorium non est dicere animam agere sine propriæ voluntatis cognitione, tum quia nemo non novit animam nullomodo sibi consciam stu-

(a) Sydenham. prax. med. sect. 3. cap. 1. Lancis. lib. de nat. corp. hum. Hall. præf. § 695. Hoffm. diss. de art. & nat. effic. in med. § 12. & 63. Vanswvier. comm. in Boeraph. 1. diss. de mot. Mechan. Mompel. propugn. ann. 1743. Lorry diss. paris. discut. ann. 1747, aliique complures.

penda peragere in delirio, noctambulatione;
ac somniis; tum quia jam pridem comproba-
vit *Borellus* necessarium non esse actum refle-
xum, quo anima advertat se velle, ad hoc
ut velit [4]. Ex motuum naturalium tribu-
sunt omnes motus vitales; quin tamen om-
nis motus naturalis sit vitalis. 3^o Qui par-
tim liberi, partim naturales sunt, ita ut
licet solius naturæ vi perfici soleant, possint
tamen pro animæ nutu varie immutari, mo-
tus mixti appellantur.

XLII. E binis animæ inhærentibus facultatibus motricibus, animali nimirum, & naturali, ad agendum alterutra determinatur, prout claræ vel obscuræ sunt ideæ boni secutandi, vel mali fugiendi, quæ animæ offeruntur. Si obscuræ vel confusæ illæ fuerint, ad agendum determinatur natura, quæ nedum assentiente libertate motus exequitur naturales. Ab ideis clavis & distinctis excitatur anima ad motus liberos edendos.

XLIII. Utriusque motuum speciei instrumeta exhibent fibræ carneæ, quibus constantur, tum tunica muscularis vasorum sanguiferorum & viscerum nonnullorum, ut æsophagi, ventriculi, intestinorum, vesicæ urinariæ &c., tum musculosa compages cordis, tum muscoli varii, fasciculi nempe fibrarum carnearum, quæ in suâ contractione decur-

tatæ partes annexas trahunt, aut vicinas comprimunt, membranâ celluloso-adiposâ roriferâ pinguedine imbutâ obvestiti, quæ in musculorum penetralia sese insinuans arterias, venas, ac nervos ad illorum textum progredientes obvolvitur, cunctosque investit fibrarum carnearum fasciculos, totam eorum compagem componentes, qui transversis fibris nervis interfecantur, & qui in minores adhuc & exiliores fasciculos dividuntur, quorum fibræ plurium adhuc fibrarum aciem oculorum & microscopii eludentium aggeriem, novosque semper fibrarum fasciculos exhibent; ita ut ea fibra, quæ microscopii ope ultima videtur, licet adhuc ex exilioribus composita, capillo centies exilior sit.

XLIV. Contrahendis musculis, movendisque eorum contractione partibus, quibus annectuntur aut prospiciunt, inservire nervos nemini non liquet, cui nota sunt tum abolita contractio muscularis in parte, cujus ligantur; aut secantur nervi [a], tum excitata vis contractilis in musculis, quorum irritantur nervi [b]. Mutationem quæris in nervis succedentem, & speciem causæ per nervos ad musculos amandandæ, ut tum animæ jussu, tum vi naturæ contrahantur muscoli. Respon-

[a] Apud Hall. præf. § 301. litt. f.

[b] Hall, exp. sur. la sensib. Journ. de med. Juillet pag. 13, 20.

det *Hallerus*, *Nescio*, & *mecum nescit*, *quid-*
quid est mortalium (a). Votis adeo feliciter
 non successit exantlatorum à celeberrimis in
 arte viris laborum eventus, quin arduis,
 nec facile enodandis difficultatibus exasperatæ
 sint excogitatæ hæcenus hypoteses variæ. Suf-
 ficiat igitur addidisse, quòd si animalis æco-
 nomix legibus, & inventis repugnet ea spi-
 rituum per nervorum compagem influentium
 celeritas [XXII], quæ respondeat celeritati,
 quâ moti animæ jussui parent muscoli, nec
 illis repugnet vibratorius fibrarum nervearum
 tremor [XXII], suspicari liceret excitato-
 rum nutu mentis humanæ, tum vi naturæ
 tremore vibratorio in nervorum origine,
 eoque per totum eorum tractum diffuso, &
 ad extremas propagato nerveas musculorum
 fibras, has adeo premere ac flectere villos
 carneos, quos intersecant, ut sic flexi mul-
 tifariam ab unâ extremitate in aliam compli-
 centur, & corrugentur memorati villi, quo-
 rum rugæ *Winslowio*, & *Hallero* patuere [b];
 imo & in externâ cordis superficie visæ fuere
 rugæ illæ, in quas fibræ contractæ crispaban-
 tur (c). Nec possunt sic in suâ contractione
 corrugari carneæ musculorum fibræ, quin eo-
 rum extrema trahantur versus centrum mus-

(a) Hall. præl. § 407.

(b) *Vvinsl. trait. des muscl.* § 48. Hall. exp. sur l'art.
Journ. de med. Juillet 1756. p. 17.

[c] Hall. phil. T. 1 p. 389.

culi, & quin brevior proinde reddatur musculus, cujus imminutam longitudinem in contractione testantur experimentum *Swamerdamii*, qui in subtilissimis ranarum musculis irritato nervo vidit aciculas adduci, quæ finem utrumque retinebant (a), ac nupera *Halleri* observatio, qui mediâ sui longitudine muscoli substantiam breviorē evadere conspexit in cane (b), quam tamen tertiâ dumtaxat suæ longitudinis parte decrescere volunt alii, & quam verisimilius est modò magis, modò minùs brevem evadere pro diverso robore contractionis fibrarum carnearum, variâque plicarum & rugarum in illis contingentium altitudine; dum è contra nec breviores evadunt, nec moventur, sed versus muscoli centrum trahuntur tendines ipsi continui [c]. Nec ipsum excipiat musculosum cor, cujus abbreviatio tempore systolis, & elongatio tempore diastolis experimentis à *Vieussenio* & *Stenone* tentatis comprobantur (d), & *Hallero* sese obviam dedere (e). Pari passu, quo corrugatæ fibræ carneæ validius ad sese accedunt, indurescit musculus contractus [f], cujus duritiem sensibilem quisque deprehender

(a) Swamerd. apud Hall. præl. § 401. litt. cc.

(b) Hall. exp. sur l'irrit. Journ. de Juillet 1756 p. 17.

[c] Hall. præl. § 401.

[d] Vieuss. de rem. & prox. mixti princ. Stenon. obser. ex var. anim. sect.

[e] Hall. phis. T. 1 p. 389. 390.

[f] Vvinn. trait. des muscul. § 26.

in masserere , dum ad maxillam adducendam contrahitur , in quo percipienda tunc intumescencia locum dat inferendi musculi ventrem intumescere in sui contractione , licet tamen totalis imminuatur musculi contracti moles , & augeatur è contra dum ille laxatur ; quod probat non solum cordis contracti moles imminuta , & in diastole increscens , verum & *Glissonii* experimentum , quo teste , immisso brachio in tubum vitreum aquâ fere plenum , subsidebat aqua , quoties movebantur , & vigorabantur musculi brachii , assurgebat è contra , dum illi remittebantur & non contrahebantur [a]. Sic tandem ad sese invicem , & ad musculi centrum accedentibus extremis fibrarum carnearum , ac tendinum eis continuorum elevabuntur appensa pondera , ad extremitatem immobilem adducetur alia , quæ mobiliori parti annexa erit , & ad immobilem aut minùs mobilem partem hæc accedet. Si orbiculares , aut helicales fuerint fibræ carnae contractæ , corpora intra orbiculi aream contenta contractione suâ prement. Eò ipsò quo cessat memoratus jam fibrarum nervearum tremor , tum animæ jussu , tum defectu vel inertia stimuli animale , vel naturalem animæ facultatem determinantis , desinit adumbrata fibrarum carnearum pressio , quibus non amplius flexis & corrugatis pristinam suam longitudi-

(a) Gliss. de ventr. cap. 7.

nem & molem recuperant, ac laxantur musculi; atque sic eorum contractioni succedit relaxatio.

XLV. Sanguinem per arterias ad musculorum compagem appellentem fibrarum carnearum flexibilitatem sustinere, earumque aptitudinem ad motum contractilem fovere non diffitendum; quatenus ab interjectis vasis sanguine exinanitis minùs disjunctæ, seseque nimium prementes minùs essent ad motum aptæ. Tanquam ergo causa disponens ad musculorum contractionem ille habeatur, quem pro causâ musculos contrahente offerre non licet; cum ligatis arteriis carotidibus immutati operentur capitis & faciei musculi [*a*]; injectâ brachiali arteriæ ligaturâ nulla sequatur paralyssis (*b*), & quatuor pedibus stet, atque iis innixus incedat canis, cujus arteriæ iliacæ injecta fuit stricta ligatura (*c*). Neque contrarium evincit subita morûs privatio in partibus posticis canis, quæ injectam sequitur aortæ ligaturam sub renibus [*d*]. A præpedito siquidem sanguinis ad posticarum partium musculos com meatu per memoratam ligaturam non procedit illa morûs eclipsis in partibus illis; sed à denegato sanguinis transfluxu ad arterias lumbares & sacras.

[*a*] Hall. phis. T. 1 p. 502.

[*b*] Parisot. apud Hall. ibid. p. 503.

[*c*] Lamure quæst. 1. pro Cathed. vac. ann. 1749.

[*d*] Steno, Vicuss., aliique apud Hall. præl. § 401. lit. g.

ab aortâ sub ligaturâ oriundas , & sanguinem ad medullam spinalem vehentes , quo in eâ deficiente deest causa motrix , quæ ad partium posticarum nervos crurales & ischiadicos mittenda foret ad earum motus ciendos ; sicut ex eo quòd vix , ac ne vix quidem talis possit institui ligatura , quin eâdem comprehendantur plures surculi nervei lumbares ad nervorum partium inferiorum compositionem conducentes (*a*), idque primum ita verum est , ut injectâ sub renibus ligaturâ non modò sensus , sed etiam motus in partibus posticis pereat ; & ut è contra uterque in illis vigeat , si non sub renibus injiciatur ligatura , sed ubi in iliacas divaricatur aorta (*b*), sicut & si ligentur arteriæ iliacæ (*c*), quamvis in binis posterioribus experimentis , non minùs quàm in priori sanguinis intercipiatur affluxus ad partes posticas canis.

XLVI. Musculum in suâ contractione pallescere , aut albescere , sanguine tunc ab illius contextu expresso , communis est opinio , nupero confutata *Halleri* experimento , quo liquet neque immutari musculi colorem , dum contrahitur , neque tunc ex illius compage sanguinem exprimi [*a*] ; neque ipsam palle-

[*a*] Lamare *ibid.*

[*b*] Astruc. de mot. marc. p. 60.

[*c*] Lamur *ibid.*

[*d*] Hall. exp. sur l'irrit. Journ. de Juillet 1756, p. 20.

ere cordis contracti substantiam, neque nativum ejusdem immutari colorem; neque sanguinem ex illius contextu exprimi (*b*); quin contrarium colligi possit ex alternis successibus ruboris & palloris in dilatato, moxque contracto corde piscium, anguium, & aliorum animalium frigidorum, atque foetus canis, in quibus membraneum est cor; cum alternans illa ruboris & palloris successio non procedat à recepto sanguine in vasis cordis substantiam alluentibus, tempore quo dilatatur, eoque ab iisdem expresso, dum illud contrahitur, sed ab admissio sanguine in cavo ventriculorum cordis dilatati, & ab illis expellendo tempore quo illud contrahitur.

FINIS.